

Faatasi i Taimi Uma

Sa fiafia Amir ina ua faamauina i le malumalu i lona aiga.

Saunia e Olivia Kitterman

(E faavae i se tala moni)

O lenei tala sa tupu i Italia.

Sa uu e Amir le lima o Tina a o la savavali atu i le malaevalele i Roma, Italia. Faatoa latou o ese mai lo latou fale i Eleni. Sa latou o i le malumalu ina ia faamauina o se aiga! O lona tuafafine matua na sau mai se mea mamao ina ia mafai ona faamauina o ia ia i latou.

“O fea Tinamatua?” Sa fesili atu ai Amir, ma tilotilo solo. Sa ia osooso teisi i ona tamaivae. Sa matuai fiafia o ia!

“O le a tatou mauaina o ia,” o le tala lea a Tina.

O “Tinamatua” e le o le tinamatua moni o Amir, ae sa fiafia o ia e mafaufau ia te ia faapena. Sa pei o ia o lana agelu faifeautalai! Sa fesoasoani o ia i lona aiga e aoao e uiga i le talalelei. Ma o lenei ua ia fesoasoani ia i latou e o i le malumalu mo le taimi muamua!

“A lale!” Na alaga atu ai Amir. “Talofa, Tinamatua!”

Sa talotalo atu le lima o Amir. Sa talotalo mai Sister Bush ma se ataata tele. Sa ia savali atu ma fusi atu Amir. “Ua e sauni?”

“Ioe!” Na fai atu ai Amir.

Sa valaau atu Sister Bush i se taavale la’u pasese e aveina atu i latou i le malumalu. Sa oso i totonu Amir i autafa o lona tuafafine. E lei umi ae liliu le taavale la’u pasese i le tulimanu, ma sa mafai ona iloa atu e Amir le malumalu. Sa matuai tele ma matagofie.

“E sili atu ona manaia nai lo ata!” Na fai atu ai Amir.

Sa savavali faataamilo Amir ma lona aiga i lotoa o le malumalu ma pue ni ata. Sa latou moemiti i lenei aso mo se taimi umi lava.

Ina ua oo i le taimi e alu ai i totonu, sa lagona e Amir e pei o loo ia savali atu i le lagi. O totonu sa mama ma susulu. Sa lelei tele tagata faigaluega o le malumalu. Sa lagona e Amir e pei o loo leoleoina o ia e le Tama Faalelagi. Sa lagona lona saogalemu.

Sa faatalitali Amir a o o atu ona matua ma lona tuafafine i se isi vaega o le malumalu. Sa faatalitali ni tagata faigaluega agalelei se toalua o le malumalu faatasi ma ia ma tuu atu ia te ia ni ofu papae e ofuina. Sa latou faali atu ia te ia se vitio e uiga ia Iesu Keriso. Sa lagona lona filemu.



Alu i le Malumalu

O le malumalu o se nofoaga paia lea tatou te aoao atili ai e uiga i le Tama Faalelagi. Ina ia alu i totonu, e te manaomia se pepa faapitoa e ta’ua o se **pepa faataga o le malumalu**. O le tausaga e atoa i ai lou 12, e mafai ona e feiloai ma lou epikopo po o le peresitene o le paranesi e aumai se pepa faataga e faia ai papatisoga i le malumalu. Afai o le a faamauina oe i lou aiga, e mafai ona e maua se faataga faapitoa e alu ai i totonu o le malumalu.

O ATA NA TUSIA E TOBY NEWSOME